



UKA 2015/27/41
14. oktober 2015
Mimi Karlsen

Inunnik annertusisamik innarluutilinnut ikiorsiisarneq pillugu FN-ip innarluutillit pisinnaatitaaffii pillugit isumaqatigiissutaanut naapertuunnerusumik Naalakkersuisut iluarsaatamik inatsisilioqqullugit Inatsisartut aalajangiiffigisassaattut siunnersuut, taamaalilluni pisinnaatitaaffiit teknikkigit inatsisinut attuumassutilinnut atuuttussanngorlugit aaqqissuunneqarlutik, allannguut kingusinnerpaamik UPA2017- imi saqqummiunneqassaaq.

(Inatsisartunut ilaasortat, Siumut)

Naalagaaffiit Peqatigiit inuit innarluutillit pillugit Isumaqatigiissutaanni pisinnaatitaaffiit siuarsarneqarnissaannut Naalakkersuisut peqquneqarnissaannik Inatsisartuni aalajangiiffigisassatut siunnersuut, tamatumani inatsimmi pineqartunut atuuttumut atuutsinneqalernissaat aammalu suliat ingerlanneqarnerini Naalagaaffiit Peqatigiit inuiat innarluutillit pillugit Isumaqatigiissutaanni Kalaallit Nunaanni atuuttut suliarineqarnerini iliuusissatut pilersaarutitut ilanngullugit suliarineqarnissaat.

(Inatsisartuni eqimattat, Inuit Ataqatigiit)

Inuit Ataqatigiit nuannaarutigaaq partit anginerit isumaqatigiillutik Naaalagaaffiit Peqatigiit inuit innarluutillit pillugit Isumaqatigiissutaata nunatsinni siuarsarneqarnissaa suliaassiissutigimmassuk.

Inuit innarluutillit pillugit Naalagaaffiit Peqatigiit Isumaqatigiissutaat danskit naalagaaffiata apeqquernagu akuersissutigimmagu ilaatigut Kalaallit Nunaanut atuuttussanngortinneqarportaaq, tamatumalu kinguneraa inuit innarluutillit pillugit Naalagaaffiit Peqatigiit Isumaqatigiissutaat Kalaallit Nunaani atuutsinneqassanersoq Inatsisartuni isummorsorfigineqaqqaarani atuutsinneqalerluni. Tamatumali kingorna Inatsisartunit akuerineqarluni.

Naalagaaffiit peqatigiit innarluutillit pillugit Isumaqatigiissutaanni pingaartinneqartut ilagaat innarluutillit allatulli naleqartinneqarnissat, innarluutillit sapinngisamik inuunerminnik namminneq aalajangiisinaanissaat aammalu innarluutillit namminneq toqqaanissaminnik pisinnaatinneqassasut, innarluutillillu sapinngisamik allanik isumalluuteqaratik inuunissaat qanillisarneqartassasoq.

Nunatsinni tamakku anguniassallugit akuerereernikuuarput, akuersinerpullu pisussaaffiliivoq. Taamaamat Naalakkersuisut siunnersuutitut marluusunut akuersaarnerat isumalluarnarlunilu qujarunnarpoq.

Innarluutilittatta pitsaasumik ineriartorfiusumillu inuuneqarnissaat tamatta qulakkeerniartariaqarparput pitsanngorsartuaannarniarlugulu.

Inuit Ataqtigiit isumaqarput innarluutillit pitsaasumik ineriartorfiusumillu inuuneqarnissaat Naalakkersuisut suliamik taassuminnga suliaqarnerminni assigiinngitsut qiviartariaqaraat. Naalakkersuisut qulakkeerniartariaqarpaat innarluutillit pitsaasumik aqutissiuunneqarnissat aamma ilinniarfinni. Inuit Ataqtigiinni isumaqarpugut innarluutillit meeqqat atuarfianit anigaangata ilinniarfissaqarnerat qulakkeerniarneqartassasoq. Ukiopassuarnimi aningaasarpasuit atorlugit meeqqat atuarfiini immikkut atuartitsineq ingerlateriarlugu innarluutillit inuusuttunngoraangata siusinaartumik suliunnaarnersiuserarneri tulluurtuunngimmat. Sapinngisamik innarluutillit inuunermut nalinginnaasumut, suliffimmulluunniit nalinginnaasumut periarfissinniartariaqarivut isumaqarpugut.

Naalakkersuisut aamma qulakkeerniartariaqarpaat innarluutillit ilinniarfinni assigiinngitsuni ilinniakkanut ilaatinneqarnissaat pitsaasumik aqutissiuutissallugu. Inunnik isumaginninnermi ilinniarfimmi immikkut innarluutilinnut suliaqarnissamik ilinniagaqarnissaq pingaaruteqarpoq. Innarluutillit sullinneqarnerat sapinngisamik ilisimasalinnik suliarineqarsinnaanngoqqullugu. Ulluinnarnittaaq innarluutilinnik ikorfartuisut pikkorissartuarneqarnissaat qulakkeerniartariaqarpoq.

Ilinniarfissuarmi immikkut atuartitsinermik ilinniartitsisut ilinniarsinnaanissaat pingaaruteqarpoq, atuartut meeqqat atuarfiini imaluunniit ilinniarfiusuni immikkut ilinniarsimasunik ilinniartitsisoqarnissaat qulakkiissallugu.

Innarluutilinnut akisussaaffik kommunitut 1.jan 2011 nuunneqarsimasup naliliiffiqineqarnissaa pingaaruteqarpoq. Innarluutilinnut sullissinermi kiffartuussinerup ajorseriannginnissaa qulakkeertariaqaratsigu.

Taama oqaaseqarluta Siumut Inuit Ataqtigiillu Inatsisartuni eqimattaasa siunnersuutaat taperserpavut.